

榆

清

巢

趙遵路著

雜

識

上

進步書
局校印

武陵趙文恪公事略

公諱慎畛。字遵路。號笛樓。湖南武陵人。乾隆己酉拔貢。學使錢南園先生器之曰。人英也。嘉慶元年。成進士。選庶吉士。授編修。庚申辛酉兩校順天鄉試。改御史。奏川楚善後事宜。上偉之。十年。分校會試。巡通州漕。革陋規。奏糧艘起撥事。發諸弊。轉給事中。十二年。充江南副考官。母憂歸。服除。補原官。湖南學政某。以矜愍失士心。欲附公自固。列公諸子優等。公仍奏劾之。遂遣戍。十七年。授惠潮嘉道。宣教化。清獄訟。優禮諸生。海陽普甯民械鬪。擄掠聚眾久。官不能治。公馳往捕誅之。沿海民多竊居。藏匪銷贓。公悉編入保甲。毀其棚寮。水陸獲盜無數。十九年。遷廣西按察使。慶遠羣民藍耀青。以天地會結眾斂錢。有廖五桂者。苦其侵暴。思結龍虎會敵之。揭帖中有平治大元帥及令地方助餉語。以恐嚇村民。事發。布政司請往。將大其事。公不可。自往按治。誅耀青及五桂。脅從皆杖釋之。自首免罪。民大安。復為條約。諭民間廣種植。浚陂塘。嚴守望。堵巖峒。摘律例中易犯者五十餘事。刊示之。廣東洋匪投誠後。漸入廣西為盜。水路設巡船。俾商民停泊有定所。衛之以兵。行守令以捕盜多寡。定舉劾。增州縣解送囚徒路費。明年。遷廣東布政使。故事。州縣解銀及領銀。皆有規費。公革之。始

至司庫貯銀四百萬。逾年乃五百三十萬。南海桑園圍石堤九千五百丈有奇。里民屢修屢決。公上言。民力已困。請以司庫沙坦花息及糧道庫息銀八萬發商取息。為歲修資。東省屯田五千三百餘頃。賦重累民。公請減屯糧額數。而酌加科則極輕之。沙坦六千餘頃。以抵之。督撫如議奏行。又以粵俗奢靡。刻行陳文恭從政訓俗二種遺規。躬節儉以示勸。連山縣城工銀以裁縣故未入奏銷。公捐廉償之。或曰子產之典可勝濟乎。公曰。濟所可濟。不能盡亦不能恕也。二十三年擢廣西巡撫。至則以農田水利為急。諭守令平疇修陂塘。設龍骨車以挽水。山田開蔭井。筒架作式。使民做之。粵西地接黔楚。盜出沒其間。飭屬查保甲。置望樓。練民壯。互相守望。縣建卡房數十座。各府以官會營巡緝。柳州至省會千餘里。增設水汛四十三所。每卡設哨船有盜則卡船舉礮。各圍丁登望樓。咸出堵擒。終公任獲盜千七百餘人。公以外盜十居七八。乃稽察客民。立客長籍之。單身流蕩者為游民。查籍遞回。山僻草寮盡毀。礦廠窯榨傭丁皆立冊。有保者留。否逐。刊為省例。又動支司庫養廉空缺銀為營汛工程之用。西撫歲支養廉銀萬兩。又梧潯二關例得動用羨餘。公歎曰。吾家衣食處足。身為大臣。復取盈焉。將安用之。當為聖主廣布仁澤耳。仍創預備倉。捐銀萬二千。令桂林

府買穀積貯以千金發典肆生息為歲修費。愛日書院久廢修復之。復建培風書院。課民間童子。柳州思恩慶遠三府縣向無書院。公出銀二千倡捐興建。於是象州羅城天河武緣雒容興業等縣皆應之。道光二年入覲成皇帝諭曰卿誠實不欺故皇考簡用以貼朕其益勉之。公頓首泣謝。八月除閩浙總督。公治軍嚴重申條約編頒諸鎮營汛身自考校備弁無虛日。叅將某驕蹇浙江提督某玩洋務皆奏劾之手札司道諸鎮密令陳所屬文武優劣驗之以事信賞必罰故所用皆得人。上游四府地僻山深漳泉江廣人多租山立廠為業。凡十餘萬人。游民混跡其間於是會匪據匪丐匪羣聚為害。公令各鄉就地勢聯絡立鄉總盜至鳴鉦逐捕加增緝捕經費遣官弁搜山著名匪首皆就獲。浙洋商艘報劫公既嚴責水師復與兩撫議立海口魚船出入章程水陸合捕所部晏然。福州閩安鎮外有琅琦島居民二千戶多為奸利濟匪。公訪聞擒治移駐水師建礮臺望樓會垣門戶益重。漳泉械鬪風未已刊故訓導謝金鑒治法論頒守令行之。漳州守周鎬賢更也以老乞去。公手書勉留令署汀漳龍道。尤以臺灣為慮盡選賢能以往。未幾鳳山民楊良斌作亂巡道孔昭雲知府孔傳樞不一月平之。噶瑪蘭民入山伐木歲供道廠軍工船料。匠首苛歛無已。山匠

林泳春因而為變。公檄鎮將捕誅之。仍博采輿論。更定採章程。蘭人乃服。臺灣十三營。戍兵萬四千。皆自內地五十三營更替。例由廈門提督點驗分汛。其歸也亦如之。遠者相距三千里。兵弁苦之。公變通舊制。令水陸二提督及福州城守。分途點驗。戍兵之困以蘇。臺本產穀地。福漳泉三府民食仰之。商運歲常百萬。江浙天津亦至焉。臺人不知益藏。又生齒日繁。歲稍歉。米貴。輒思為亂。公令稽出口米船。月報實數。酌年豐歉。定限制。俾民間常留有餘。三年夏。浙江水災。公奏請賑卹。復捐俸倡勸紳商。得穀六千。米一萬七百。銀七十萬五千。展賑限。全活無算。凡就食流民。令所至州縣。詢男婦名數。給滾單撫卹。是秋。浙中米踊貴。閩撫欲運倉穀往濟。公以臺灣歲豐。乃奏弛海禁。招商販臺米濟浙。浙足而閩倉如故。閩鹽不銷。官商積困。公奏減南靖長泰二縣額引。撥入臺灣府屬。並停徵商欠。官民便之。四年。奏請以明儒黃忠端公道周。從祀文廟東廡。位列羅文莊公之次。故訓導侯官謝金鑾。教授德化鄭兼才。有學行。敦崇名節。公敬異之。令舉祀鄉賢。五年。調雲貴總督。貴州彌望皆童山。近歲大吏勸民種樹。樹放蠶。收繭織綢。甚有利。而守令或以為迂。公察所屬多未行。手教勸之。且捐給工本。抵滇。壹意以撫靖邊夷。整飭銅鹽為務。既陳銅鹽積弊。又以防邊之策。

無逾屯田。日與滇撫考地圖。訪形勢。經營屯政。及安撫土司。建設碉堡。練丁防守諸制。以積勞成疾。五月一日薨於位。年六十五。有詔優卹。贈太子太保。諡文恪。贈祭葬如例。公少孤。從舅氏王春野游。教以勵行克己。後益博覽先儒格言。凡有益身心可致用者。皆潛心體驗。聞儕輩中嘉言善行。則惕然不自已。通籍後。致力尤勤。為日記至易簣乃已。灼知州縣之困。體卹甚至。而不可干以私。見屬吏有道府以下。懇切訓戒如師弟。是非賢否。喜怒不藏。曰。吾於人無私愛憎。何必使妾相揣測耶。有所詰責。其人能以理自申。必賞異之。卒從所請。遇事關民生疾苦。國家憂樂者。思之輒竟夕不寐。必得當乃已。督滇黔時。病已亟。猶疏劾貪墨吏數十人。閱日屬續。代者發急遽追回。滇人皆痛惜之。公嘗顏其室曰省誓。年位逾進。功益密。好善嫉惡。乃益真且嚴。昆明錢公所謂人英者。公真無愧也已。公著奏議八卷。從政錄八卷。載筆錄四卷。榆巢雜識二卷。省誓室續筆記一卷。讀書日記四卷。惜日筆記二十卷。詩文集六卷。公入祀福建名宦祠。湖南鄉賢祠。子敦詩。字鼎門。由戶部山東司主事。官至陝西道監察御史。鯁直敢言。屢劾權貴。僚友為花松岑。宗滌樓。梅伯言。姚石甫。湯海秋。魏默深。陳雲心。類皆風骨嶒嶸。以道義文章相砥礪。而與陳雲心尤稱莫逆。故以女妻之。相

攸之贊。則魏默深也。孫篤思。咸豐之季。應前湖南糧道王初田之招。隨營勦辦桂東股匪。旋從郭懷叟。成靜齋。諸鄉先生。辦理東征籌餉事。同治二年。蒙前大學士左文襄公。奏調浙營。勦事戎幄。以克復衢嚴杭州等城。保奏以知縣留浙補用。歷宰繁劇。多善政。荐升至道員。曾孫於密。現官江西道員。歷守建昌袁州臨江諸郡。

榆巢雜識卷上

清 武陵趙慎畛遵路著

太祖高皇帝以遺甲一十三副仗順興師肇開鴻業臨御之日大抵秉旋執鉞居多世祖章皇帝定鼎燕京視帝堯起自唐封尚先五載國家舊制始置內三院後乃改置內閣以出納綸音自增用奏摺以後皆親御丹毫在廷之臣一辭莫贊即硃批諭旨是也其題本由內閣票擬者遇事涉兩歧輒恭繕雙簽以請至訓誥特頒則指授內直諸臣於禁廷具草有纖微未達聖意者必御筆塗乙添注鑒定之後降付內閣宣布中外而已

我國家發祥長白實肇基於俄朵里城後肇祖原皇帝始遷赫圖阿拉是為興京太宗文皇帝對定遼東實作周邑暨世祖章皇帝定鼎順天遂以奉天為盛京兩都並建

蒙古諸部係元之部族自明以來攻伐之事未嘗絕迨我朝隆興東土惟察哈爾林丹汗恃其頑梗卒就滅亡其餘則天命四年科爾沁首先內附郭爾多斯杜爾伯特札賴特隨之天聰元年教漢奈曼來歸二年巴林札魯特來歸三年士默特來歸六

年阿祿科爾沁歸化城土默特來歸。七年四子部落吳喇忒翁牛特喀喇沁來歸。八年嵩齊忒烏朱穆秦克西克騰毛明安來歸。九年阿霸垓蘇尼特鄂爾多斯來歸。崇德初阿霸哈納爾亦來歸。

初孔有德尚可喜耿仲明均以故明將佐於太宗時率衆來歸。隨八旗征討多立戰功。有德封定南王。可喜封平南王。仲明封靖南王。吳三桂本明總兵。世祖驅除流寇定鼎燕京。亦以效命執父得邀封平西王。後有德死殉孤城。至今廟食。仲明分藩於福建。可喜分藩於廣東。三桂分藩於雲南。仲明歿以其孫精忠嗣封。可喜年老乞閒以其子之信攝軍事。三桂獨稱宿將。列重鎮於西南。遂於康熙十二年十一月稱戈抗命。進薄衡湘。與官軍相拒於常德。之信精忠亦乘機蠢動。聖祖仁皇帝特簡八旗勁旅。指授方略。剿撫並用。三桂勢屢憂怖。旋經病歿。孽孫世璠遊魂金底。既而之信精忠窮迫歸正。均正刑章。至康熙二十年十月。世璠惶懼自戕。三逆並滅。二十一年以大學士等為正副總裁官。纂修平定三逆方略六十卷。三逆恃恩驕恣。日形跋扈。康熙十二年因其自乞移藩。詔允所請。逆謀即發。是年十一月。三桂舉兵反。直窺湖廣。乃遣馳赴荊州。進據常德。以遏賊勢。三桂既死。逆孫世璠尚踞滇中拒命。而耿精

忠自請入朝。旋訊得其通賊反覆。決磔於市。尚之信雖嘗歸正。而心懷兩端。鞠實賜死。廣東平。二十年十月。大兵攻圍雲南省城。世璠自殺。其屬悉以衆降。乃戮世璠首。獻於京師。雲南平。

康熙十三年四月。耿精忠據福建反。上命惠獻貝子富喇塔為寧海將軍。同大將軍康親王傑書統兵討之。是年至台州。破賊於黃瑞山。又連破之紫雲山。九里寺山。十四年。敗其衆於黃土嶺。賊將曾養性乘夜遁去。遂復黃巖縣。進取溫州。浙東底定。其事具載宗室王公功績表傳。及八旗通志中。

準噶爾部落。係出元阿魯台。譯語轉音。故稱尼魯特。天命時。嘗遣使入貢。世祖錫以封爵。俾自領其衆。迨噶爾丹侵擾喀爾喀諸部。聖祖親討平之。北邊以寧。其姪策妄阿拉布坦先與噶爾丹構釁。跳而西遁。踰伏伊犁。後生息漸蕃。稍為邊患。我聖祖世宗屢申撻伐。折其逆萌。澤旺阿拉布坦之子噶爾策丹始戢鋒受命。高宗純皇帝示以綏柔。許通貢市。用廣覆載之仁。後達瓦齊戕噶爾策丹之子喇嘛達爾札。擁衆自立。部曲不附。紛紛內向。欵關。準噶爾遂大亂。乾隆三十七年。大學士傅恒等所撰方略。前編五十四卷。所紀自康熙三十九年七月乙未。至乾隆十七年九月壬申。即詳述

其緣起也。嗣杜爾伯特台吉策凌烏巴什輝特台吉阿睦爾撒納等先後來歸。額請天討。特詔六師兩道出討。兵不血刃。五月而定伊犁。俘達瓦齊於圖爾滿。既而阿睦爾撒納豺狼反噬。波羅尼都霍集占同惡相濟。俱即時授首。拓地二萬餘里。是書正編八十五卷。所紀自乾隆十八年十一月甲戌至二十五年三月戊申。即備錄其始末也。至續編三十三卷。則乾隆二十五年三月庚戌以後。至三十年八月乙亥。凡一切列戍開屯。設官定賦。規畫久遠之制。與討定烏什及絕域諸蕃。占風納賁者。咸載焉。

臺灣自古不入版圖。聖祖仁皇帝命靖海侯施琅等。俘鄭克塽。而郡縣其地。設官置戍。屹為海上金城。康熙辛丑。朱一貴倡亂南澳。總兵藍廷珍與水師提督施世驍合兵進討。七日而恢復臺灣。旋擒一貴。其後鉞蝟斧螻。偶或竊發。旋亦撲滅。

順治初。詔刑部尚書吳達海等詳考明律。參以國制。勒為成書。頒布中外。康熙九年。大學士管刑部尚書事。對喀納復奉詔校正。雍正元年。大學士朱軾尚書查郎阿等奉詔續成。乾隆初。又因尚書傅鼐之請。詔廷臣逐條攷正。

漢人未有官副都統者。康熙時。陳昂同安人從靖海侯施琅征臺灣。搜捕餘黨。出入東

西洋五年叙功授職官至廣東副都統蓋特典也

錢塘人陳漢字天一為河督靳輔幕客多所經畫康熙甲子輔以聞特賜叅贊河務按察司僉事銜

金川土司在四川徼外本吐蕃遺種明史所謂金川寺者是也國朝康熙中其土舍色勒奔初募化歸誠奉職維謹雍正中頒給印信號紙俾世守故疆其子郎卡襲職漸肆鴟張搏噬族類守姓請加誥以寧九姓上以荒憬不足勞師惟勅慎固邊圉以防其變而沙羅奔仍肆兇殘不思悔過乃於乾隆十三年冬特簡大學士傅恒為經略率師進討始窮蹙乞降上許以自新特詔班師自禡牙以迄飲至往返一二萬里為期不及兩年蓋終沙羅奔之身蹙伏荒徼莫敢煽動大學士來保等恭撰平定金川方略三十二卷恭錄御製詩文一卷又附載諸臣紀功詩文五卷

金川自郎卡歸不敢復逞兇鋒其子索諾木與其頭人丹巴沃雜爾煽惑小金川酋僧格桑鯨吞九姓無故稱戈諭之不從彌滋狂悖高宗純皇帝天斷獨行再舉六師重申九伐僧格桑專車之骨先獻旌門既而轉戰深入索諾木亦窮蹙就俘乾隆四十六年大學士阿桂撰進平定兩金川方略紀其事自二十年六月癸亥起至四十

四年十一月壬午止。

回人祖國稱默那。其種類居天山之南北。後準噶爾據有山北。乃悉避於山南。今自哈密吐魯番以外。西暨和闐葉爾羌。皆所居也。迨諸回部並隸版圖。中國回人數與往來。奸黠之徒。詭稱傳法於祖國。別立新教。與舊教構爭。互相讐殺。遂至嘯聚稱戈。乾隆四十五年四月。循化廳逆回蘇四十三等。突陷河州。又犯蘭州。會援師四集。乃退據城南十里龍尾山。扼險死守。官軍百道俱進。蹙之於華林寺。無一人漏網者。蘇四十三等既誅。馬明心餘孽猶多。勅陝甘總督李侍堯密為經理。侍郎籌畫未周。致逆回田五噓馬明心已燼之焰。詭稱官軍將盡剿新教。轉相煽惑。乾隆四十九年四月十五日。猝起變於小山。迨田五為提督剛塔所敗。勢窮自戕。餘黨張文慶馬四娃等。復乘機嘯聚。與剛塔相拒於馬家堡。翻山宵遁。蔓延四出。肆其猖獗。上赫然天斷。特命兵部尚書福康安為陝甘總督。統兵進討。復詔大學士阿桂督師策應。逆回羣聚於通渭之石峯堡。號稱天險。阿桂等列圍蹙之。斷其水道。衆遂宵潰。是歲七月五日。焚巢掃穴。西陲大定。

天命五年六月。樹二木於門外。有欲訟者。書而懸之木。覽其顛末而按問焉。由是民情已綏得上達。

天聰八年。禮部考取通滿洲蒙古漢書文義者為舉人。十六人各賜衣一襲。免四丁宴於禮部。此我朝開科之始。

我朝初設黃紅藍白四旗。天命乙卯。添設四旗。參用其色。鑲之。共八旗。

歷代傳國玉璽。相傳為元順帝攜逃沙漠。後遂遺失。越二百餘年。牧羊者見羊三日不食。以蹄跪地。掘獲此璽。後歸察哈爾林丹汗。天聰八年。貝勒多爾袞睿親王獲之於

額哲母所。其文漢篆制誥之寶四字。

順治元年。修政歷法。湯若望

欽天監監正
號通微教師

進所製渾天星球。地平日晷。窺遠鏡。各

一具。請所有應用諸歷。永依西洋新法推算。言敬授民時。全以節氣交宮。與太陽出入晝夜時刻為重。節氣之時日不真。則太陽出入晝夜刻分俱謬。歷稽大統。回回舊歷。所用節氣。止泥一方。即以北直論。春分秋分前後。俱差一二日。新法之推太陽出入地平環。則有此晝而彼夜。此入而彼出之理。非若舊法以一處而概諸方。故種種差謬等語。由是以新法所有諸法。節氣及太陽出入晝夜時刻。照道里遠近推算。共增數頁。加於篇首。

順治元年。給事中郝傑疏言。自古刑餘宦寺。特供洒掃。從不敢與朝臣齒。明末寵任

廠衛後遂貽杜勲閭思印邊永清等開門迎賊之禍我朝痛絕中官廠衛錢糧悉歸有司遠近無不歌頌今頒詔大典賜宴廷臣特有內監數輩先行拜舞乞勅部嗣後朝賀內監不得入班行禮尤有請者先朝原有牙牌舊制應仍照品級懸帶至雜流貲官不得濫越詞林科道侍從之前得旨內監毋許混入朝班牙牌事宜下所司議順治四年江西撫李翔鳳進正一真人張應景符四十幅得旨為治之道惟在敬天勤民安所事此朝廷一用天下必至效尤其置之

康熙三十九年諭大學士等觀翰林官及庶吉士有極貧者衣服乘騎皆不能備將此等查出宜何施恩有益供職其丁憂告假回籍之庶吉士有無力至京者着該督撫酌資助令其來京又翰林官員專司文翰各省學道員缺應與郎中並差經大學士等議自讀講以下開列職名請旨點派各省學道及擇其貧者月給銀三兩我朝軫念寒畯之恩洽及骨髓矣

聖祖諭巡撫趙宏燮曰大量田地不可不知天下隱匿田地不少但不可搜剔耳夫算法之禮皆出自易經即西洋算法亦善原係中國算法彼稱為阿爾朱巴爾阿爾朱巴爾者傳自東方之謂也凡推算九九之奇數不能盡悉十二二十四之偶數方

能盡之。此皆體象十二時二十四氣也。

聖祖諭曰。清官多刻。刻則下屬難堪。清而寬。方為盡善。朱子云。居官人清。而不自以為清。始為真清。又諭督撫大吏。辦事當於大者體察。不可刻意苛求。寬則得眾。信則民任焉。治天下之道。以寬為本。若吹毛求疵。天下人安得全無過失。趙申喬撫浙時。民多怨之。後撫湖南。大小官員無不被參。豈有一省之內。無一好官耶。聖訓煌煌。立萬世人臣之極。敬謹筆記。

康熙六十年會試。副都御史李紱。充副考官。揭曉後。下第舉子擁至宅門。喧闐而散。被御史叅劾革職。發永定河効力。

社倉。水利。愛養良法。行之難得其人。即有人。尚難期效。我朝李文貞光地張清恪伯行均常行之於直隸地方多年。迄無成效。康熙六十年。總憲朱文端奉差賑濟山右。又奏請於晉省建立社倉。再興水利。奉諭曰。凡建社倉。必擇地方殷實之人。董司其事。此人既非官吏。無役無權。所借之米。何人催納。豐年不還。亦無如何。若遇歉收。更誰還耶。其初將眾人之米穀扣出收貯。無人看守。及缺空之時。必令司事者償贖。是空將眾人之米棄於無用。而司事者無故為人破產矣。此法始於朱子。僅可行於小

邑鄉村。若奏為定例。屬於官吏施行。於民無益。訓旨周詳。切中事宜。敬記之。
各省教職。俱以舉人恩拔副歲貢生補用。其捐納人員。教諭改以縣丞。訓導改以主簿。用雍正元年例。

凡部院衙門。俱設司官。專管定稿說堂。筆帖式專管繕譯。廳官專管收發文書。翰林院錢糧出入。升遷議敘。俱出自筆帖典簿之手。雍正初。勅下掌院學士。擇俸淺編檢內才守優長者。滿漢各二員。充作司官。專主定稿說堂。其所委充之員。果辦事公敏。仍令掌院據實具奏。

在京大小臣工病歿。兵部照生前品級。填給勘合。此順治十三年例。

康熙三十八年。京堂懸缺者多。翰林壅滯。吏部始遵諭。將現出京堂缺。及翰林官職名一併開列。

康熙三十九年十月。皇太后六旬聖壽。上恭進佛像。御製萬壽無疆賦圍屏等物。外令膳房數米一萬粒。作萬國玉粒飯進獻。以天下養。孝之至也。四十二年三月。恭逢上五十萬壽。羣臣請行慶典。諭有以詩文獻者留覽。由是諸臣恭進慶祝萬壽屏。復以屏文繕寫冊頁進呈。旨留冊頁。却屏。此俯允呈進冊頁之始。